



simus LAMBACHERUS notis suis illustravit, qui etiam inde concludit prædicta spatia extra Urbis ambitum olim fuisse, cum lege XII. Tabularum sepulturæ intra urbium muros vetarentur.

Sed jam ad meritum causæ: si ex tot antiquitatibus Romanis manifestum est, Romanam aliquam Civitatem hic loci existisse: quæ obsecro, fuit, si non VINDOBONA?

Manfit hoc urbi nomen, vel subinde, non eruditius, ut ego autumo; sed corruptius *Vindomana*, usque ad Annum Christi 451. quo sub ATTILA Rege ab Hunnis per has terras in GALLIAM irrumpentibus forsitan vastata, non vero everfa est. ATTILA subinde in PANNONIAS reverso iterum a Romanis, adscitis in societatem RUGIS, restituitur circa annum salutis 454. quo ATTILA periit.

C A P U T V.

*VIENNAM eandem esse cum FAVIANA demonstratur
contra LAMBECIUM, & PAGIUM.*

FAVIANÆ, vel ut corrupto subinde vocabulo dicta est, FABIANÆ nomen primus EUGIPIUS in vita S. SEVERINI prodidit.

Hanc



Hanc nomenclationem pro VINDOBONÆ nomine urbs nostra verisimillime accepit a FLACCITHEO, & FELETHEO *Rugorum* Regibus, quorum secundus FEVA; vel (ut habet BOLLANDUS, & M. S. *Mansense*) FAVA; vel (ut EUGIPPIUS scribit c. 23.) FAVIANUS dicebatur, communi forsan cum patre nomine: nisi EUGIPIUS VINDOBONAM per prolepsin ante FAVIANAM nuncupet; quam a FELETHEO filio hoc nomen fortiretur.

Mutati nominis ratio fuit potestas *Rugorum* Principibus his in locis communicata a Romanis contra invalescentes GOTHORUM in PANNONIA vires; sedes item Regia ab iis hic constituta, urbsque ab *Hunnorum* clade instaurata. Ita censet CALLESIUS *Annal. Austr.* P. I. pag. 583. idemque jam censuit Anno 1684. ERASMUS FRANCISCI in Urbis nostræ *descriptione.* pag. 6.

Sanctus porro SEVERINUS post ATTILÆ interitum, circa annum 454. ex oriente veniens, substitit primum in ASTURIS, quod ex locorum situ GREIFFENSTEINA esse videtur. Vid. CALLESIUM *Annal. Bab. P. I. p. 93.* In hujus loci arce, antiquissimi operis sacellum, aramque SANCTO huic, ceu in suæ commorationis memoriam dicata, ipse inspexi.

Ex hoc, aliisque locis sæpius in oppidum *Favianis* SEVERINUS descendit: extra illius muros ad rivum *Al-*



ſam templum conſtruxit in honorem S. JOANNIS BAPTISTÆ: majori intervallo Monasterium cum Ecclesia ſanctorum GERVAſII & PROTASII condidit, quod poſtea ob Fundatoris, & Monachorum ſanctimoniam HEILIGENSTADII nomine ornatum eſt. Vide CALLESIUM *Annal. Auſtr. P. I. p. 96.* Haud procul inde privatam ſuam cellam conſtituit Vir ſanctus eo in loco, qui deinceps ab ejus nomine SIVERING dictus eſt. CUSPINIANUS in *Auſtria ſua.*

His in locis morabatur ſanctiſſimus Abbas ſub FLACCITHEO, & FELETHEO RUGORUM Regibus, & quamquam Dei, animarumque cauſa ſæpius inde digrederetur, identidem tamen eo revertebatur.

Anno C. 475. ODOACER Herulorum Rex, Italiam petens, SEVERINUM *Heiligenſtadii* convenit, ab eoque regni in Italia capeſſendi augurium accipit.

Circa annum 476. moritur FLACCITHEUS Rex RUGORUM, ſuccedit filius ejus FELETHEUS.

Anno 482. In Monasterio ſuo *Heiligenſtadienſi* pientiſſime obit SEVERINUS.

Sub idem tempus FAVIANÆ Episcopus fuit MAMERTINUS, qui ibidem ſub S. SEVERINO Romanorum militum tribunum egerat; aliam enim Episcopatus ſedem EUGIPPIUS ei non aſſignat. Adſtipulatur HANSIZIUS *Germ. Sacr. T. I. Coroll. IV.* Pagina tamen 85. & 87. rejicit ſucceſſores *Marcianum, Lucillum, Cunal dum, Sodo-*



Sodomum, & Haymonem, quos LAZIUS, & ex eo CAROLUS à S. PAULO Mamertino tribuunt.

Anno C. 487. ODOACER jam tum Rex Italiae FLETHEUM Regem cum GISA uxore, dilapso eorum filio Friderico, in Italiam abducit.

Anno C. 488. FRIDERICI RUGORUM Regis novos motus misera agri nostri vastatione per ARNULPHUM fratrem suum ultus est ODOACER, Romanosque una cum sancti SEVERINI illibato corpore per PIERIUM domesticorum Comitem in Italiam deportat. *Cunctis nobiscum* (scribit EUGIPPIUS c. 45.) *provincialibus idem iter agentibus.* Ex quo docemur, & Monachos omnes una HEILIGENSTADIO abscessisse, & oraculum illud SEVERINI impletum esse: *Hæc loca in tam vastissimam solitudinem redigentur, ut hostes æstimantes auri quidpiam reperturos, etiam mortuorum sepulchra effodient. Cujus vaticinii veritatem eventus rerum præsentium comprobavit.* Ita EUGIPPIUS c. 27. Et confirmat PAULUS WARNAFRIDUS Diacon. L. I. *Rer. Longob. c. 19.*

Non solum tamen ODOACRUM cum Herulis illatæ vastitatis causam fuisse indicat ENNODIUS, dum scribit in vita Beati ANTONII Monachi Lyrinensis apud SIRMONDUM T. I. *Sed jam peccatorum consummatio Pannoniis minabatur excidium, - - - Per incurfus enim variarum Gentium, quotidiana Gladiorum seges messem nobilitatis abscederat, & sæcundas humani generis terras*



ira populante desolabat. Jam Franci, Heruli, Saxones (ex quibus Longobardi erant) multiplices crudelitatum species belluarum more peragebant, &c.

Nota tamen, dictum FRIDERICUM, Rugorum Regem, ODOACRO exitio fuisse; contra hunc enim THEODORICUM Gothorum Regem concitavit.

Jam ad rem nostram: FAVIANAM eandem esse cum hodierna VIENNA conficitur ex ejusdem distantia PASSAVIO, quam ultra centum millia passuum, itinere nempe navali, quale S. SEVERINUS confecit, EUGIPIUS extendit. Congruunt præterea gesta & loca, quæ in vita S. SEVERINI referuntur.

Et ubi ergo illa EUGIPII FAVIANA? ubi illa FAVIANA, cujus Episcopum RATFREDUM EUGENIUS II. circa Anno 826. nominat? ubi illa FAVIANA villa cum tribus Sacellis, S. PETRI, S. RUPERTI, S. PANCRATII, quæ B. ALTMANNUS Pataviens. Episcopus Gottwicensibus contribuit? ubi FAVIANA illa, ad quam HENRICUS JASOMIRGOTT ex infausto cum Hungaris prælio An. 1146. confugit? An erravit OTTO FRISING. HENRICI hujus frater, dum scribens de Gestis FRIDERICI I. Imp. L. I. c. 32. ait: *Dux (Henricus) in vicinum oppidum Viennis, quod olim à Romanis habitatum, Favianis dicebatur, declinavit.*

At inquires: SEVERINUS *Noricorum Apostolus* appellatur? Recte id quidem; quandoquidem non in vicinia



cinia tantum Norici, sed in Norico ipso, Asturis, Comagenis, Laureaci, Cucullis, Bojoduri Apostolum egit.

Repones: sed PASCHASIUS Diaconus ad EUGIPIUM scribit: *Quod finitimas Pannoniorum provincias incoluerit Severinus*; & PAULUS Diaconus: *quod ejus cœnobium in Noricorum finibus fuerit*. Uterque ex rei veritate: an enim in Noricorum finibus non erat SEVERINI Cœnobium; si fuit HEILIGENSTADII? alterum autem ad fluviolum BOITRO prope PASSAVIUM cis OENUM? An finitimas Pannoniorum provincias non incoluit SEVERINUS; si per intervalla moratus in Asturis, Comagenis, Laureaci, &c.?

Animadvertendum denique, partita jam tum inter Gothos Pannonia, FAVIANAM Romanis & Rugis obnoxiam, quasi pro appendice Norici habitam fuisse.

Plura de his vide apud HANSIZIUM T. I. c. XIV. pag. 71. & apud FUHRMANNUM in sua AUSTRIA, & VIENNA: item apud CALLESIUM in *Annal. Babenbergensium AUSTRIÆ Principum*. Atque hos secundum annorum seriem consules, quoties deinceps specialis author a me non citabitur. In rebus tamen, quæ ad Urbem nostram maxime pertinent, quæque opinionibus hætenus receptis adversantur, testes fide digni nunquam desiderabuntur.